

欽  
定  
全  
唐  
文

欽定全唐文卷六十目錄

憲宗 五

令覆奏決囚詔

立鄧王爲皇太子詔

貶楊憑臨賀縣尉詔

命裴冕配享肅宗李晟段秀實配享德宗廟庭詔

賑貸淮南浙西詔

存撫鎮州百姓詔

停戶部尚書李元素官詔

褒裴垪等進德宗實錄詔

停明年耕藉詔

置兩稅使詔

旌前集賢殿校書郎丁公著詔

令百官職田權充度支詔

停河南陝府水陸運及潤州等使額詔

勸種桑詔

立遂王爲皇太子詔

禁餉遺人口詔

定戍邊遠近詔

貶路恕田景度等詔

授李渤祕書省著作郎詔

貶李位建州司馬詔

命渾瑊配享德宗廟廷詔

復置宥州詔

錄李洧等子孫詔

授康志寧等官詔

禁捕狐兔詔

令御史臺勘覆諸司食料錢詔

貶潘高陽均王府長史詔

捕殺武元衡盜詔

禁捕盜煩擾僧人詔

嚴犯賊罪詔

諭鎮州官吏將士詔

令楊元卿優恤淮蔡歸順百姓詔

令刺史言事詔

封吳秀琳濮陽郡王詔

封鄧懷金新平郡王詔

令定州入粟助邊詔

却還處州刺史進助軍錢絹等詔

誅吳元濟詔

赦王承宗詔

罷諸道節度使兼支度營田使詔

欽定全唐文卷六十

憲宗五

令覆奏決囚詔

自今以後在京諸司應決死囚者不承正勅並不在行決之限如事迹凶險須速決遣并特勅處分者宜令一度覆奏

立鄧王爲皇太子詔

朕聞君天下者繼承統業何嘗不樹建儲貳安固邦家況長子有主器之義元良貞立國之本上以嚴宗社之重下

以順恒久之宜歷考前載率由斯道鄧王寧性與忠敬生  
知孝友秉寬明之度體慈愛之心學師訓謨詞尚經雅動  
皆中禮慮不違仁稽以舊章允膺上嗣朕獲纘丕緒夙夜  
虔恭常懼神明未敢攷理多闕曠茲茂典亟涉歲時今屬  
方隅甫寧品物咸遂覽皇王之制詢卿士之謀時瞻大猷  
莫此爲重是用授之七鬯位以青宮欽惟永圖俾服休命  
宜冊爲皇太子仍令有司擇日備禮冊命主者施行

貶楊憑臨賀縣尉詔

楊憑頃在先朝委以藩鎮累更選用位列大官近者憲司



奏劾暴揚前事計錢累萬曾不報聞蒙蔽之罪於何逃責  
又營建居室制度過差侈靡之風傷我儉德以其自尹京  
邑人頗懷之將議刑書是加愍惻宜從遐譴以誠百僚可  
守賀州臨賀縣尉同正仍馳驛發遣

命裴冕配享肅宗李晟段秀實配享德宗廟庭詔  
朕聞昔之佐時制物者咸有大功是惟五官以配五帝自  
時厥後有國家者莫不以輔弼之寄社稷之勲名登大蒸  
陪享清廟苟非茂德孰允盛儀贈太尉冕望重巖廊爲時  
貞幹靈武艱阻首贊經綸宣力股肱平心鼎鉉任戡定之

成業推翼戴之嘉猷贈太師晟識精韜鈴神假雄武建中  
寇孽躬踐憂虞垂餌虎狼致威樽俎刷宮廟之塵穢迴日  
月之光輝贈太尉秀實氣全剛柔節固金石凶渠僭逆潛  
蹶根萌矯命還師衷刃決死紓阽危於怵迫挫狂狡之奸  
謀並材爲時生用當國否感雲龍而應變炳辰象以降靈  
光復寰區振揚風槩勲庸藏於盟府寵飾備於前朝光陰  
不追盛烈如在朕頃因郊祀爰舉典常俾差茂勲以配殷  
祭惟咸有一德允屬乎三臣庶昭示於將來式崇恩於既  
往冕宜配享肅宗廟庭晟秀實宜配享德宗廟庭

賑貸淮南浙西詔

淮南揚楚滁三州浙西潤蘇常三州今年旱歉尤甚米價殊高言念困窮豈忘存卹宜以江西湖南鄂岳荆南等使折糴米三十萬石賑貸淮南道三州三十萬石貸浙西道三州恐此米來遲不救所切宜委淮南浙西觀察使且各以當道軍糧米據數給旱損人等節級作條件賑貸淮南李吉甫浙西韓臯躬親部署令刺史縣令切加勾當使此米必及饑人以副朕意如賑貸三州之外可及諸州亦聽量便宜處置待江西等道折糴和糴米到各處依數收管

存撫鎮州百姓詔

鎮冀管內諸州百姓等莫匪王人皆同赤子蓋戀生業遂  
迫凶威暴賦急征旣嗟於無告冒鋒觸刃又慮其俱焚言  
念於茲良深憫惻其應討伐鎮州諸軍所到之處宜先存  
撫百姓使安其業勿令虜掠傷害以副朕心

停戶部尚書李元素官詔

李元素病中上表懇切披陳云妻王氏禮義殊乖願從離  
絕初謂素有醜行不能顯言以大官之家所以令自處置  
訪聞不曾告報妻族亦無明過可書蓋是中情不和遂至

於此脅以王命當日遣歸給送之間又至單薄豈惟王氏受辱實亦朝情盡驚如此理家合當懲責宜停官仍令與王氏錢物通所奏數滿五千貫

褒裴垪等進德宗實錄詔

朕獲纘丕緒憲章成式永維皇祖之訓巍乎一代之典爰俾撰錄垂之無窮以卿台輔元臣清直正氣博貫程制該通古今載筆之司遂命監領果諧朕志克就厥功縑緗永存風烈盡在祗若遺範感慰良深眷乃勤勞增用嘉歎所進知

停明年耕藉詔

朕以東郊藉田禮之重者爰擇吉亥用祀先農上以供粢盛下以勸稼穡式展三推之義敢辭四體之勤亦旣草儀方將肅事載思理本旁采衆詞以江淮水旱之餘河朔師旅之後宜寬物力以濟烝元況當三農休息之時百司供具之費道塗灑掃暴露勤勞惕然在懷是用中止雖前有成命皆已施行而重煩吾民則無固必其來年正月十六日藉田禮宜停於戲夫聖人無心以徇百姓朕亦虛已用圖大中苟事有未宜則改而求當凡百卿士期悉朕懷

置兩稅使詔

兩稅之法悉委郡國初極便人但緣約法之時不定物估  
今度支鹽鐵泉貨是司各有分巡置於都會爰命帖職周  
視四方簡而易從庶叶權便政有所弊事有所宜皆得舉  
聞副我憂寄

旌前集賢殿校書郎丁公著詔

丁公著辭官侍親不顧榮利高行至性人倫所稱今執喪  
致毀又聞過禮其所請旌表門閭宜依仍委本州刺史親  
自慰問并量給粟帛

金史卷之二十一  
三  
令百官職田權充度支詔

百官職田其數甚廣今緣水潦諸處道路不通宜令所在貯錢充度支支用百官却令據數於太倉請受

停河南陝府水陸運及潤州等使額詔

朕於百執事羣有司方澄源流以責實效轉運重務專委使臣每道有院分督其任今陝路漕引悉歸中都而尹守職名尚仍舊貫又諸道都團練使足修武備以靖一方而別置軍額因加吏祿亦既虛設頗爲浮費思去煩以循本期省事以便人其河南水陸運陝府陸運潤州鎮海軍宣



州采石軍越州義勝軍洪州南昌軍福州寧海軍等使額  
並宜停所收使已下俸料一事已來委本道充代百姓闕  
額兩稅仍具數奏聞如聞河南陝府兩處比來所給皆是  
置本利息不破正錢勒便添充兩餉錢雜給不要更徵庶  
我愛人之心不止於惜費立制之意必在於正名

### 勸種桑詔

農桑切務衣食所資如聞閭里之間蠶織猶寡所宜勸課  
以利於人諸道州府有田戶無桑處每檢一畝令種桑兩  
根勒縣令專勾當每至年終委所在長吏檢察量其功具

殿最奏聞兼令兩稅使同訪察其桑仍切禁採伐犯者委長吏重加責科

立遂王爲皇太子詔

門下承廟祧之尊固邦家之本重其緒業貞以元良斯今古之通制也乃者春官曠位已涉歲時裸獻缺主鬯之儀膠庠虛齒學之道其何以億寧方夏彰示教源稽諸往冊用舉彝典遂王宥孝敬忠肅寬明惠和遵保傅之言佩經訓之旨友于兄弟睦于宗親博愛而恕己以誠慎行而飭躬以禮載觀所履克茂厥猷宜升儲闈以對休命朕祇若

承憲惟懷永圖法三王垂統之規紹十聖重光之烈致嚴  
裡配俾奉棗盛式昭上嗣之崇庶叶明離之吉宜冊爲皇  
太子改名恒仍令有司擇日備禮冊命主者施行

禁餉遺人口詔

比聞嶺南五管并福建黔中等道多以南口餉遺及於諸  
處博易骨肉離析良賤難分念茲遠人受抑無告所以去  
歲處分諸道不令進獻近因賂遺事覺方驗詔旨不行雖  
量輕重各正刑典猶慮未降明勅尚有因循自今嶺南諸  
道輒不得以口餉遺及將諸處博易又有求利之徒以口

博易關鎮人吏容縱頗多並勒所在長吏嚴加捉搦如更違犯必重科懲如長吏不存勾當委御史臺察訪聞奏

定戍邊遠近詔

減死戍邊前代美政量其遠邇亦有便宜自今已後兩京及關內河南河東河北淮南山南東西道州府有犯罪繫囚除大逆及殺人外其餘應入死罪並免死配流天德五城諸鎮有妻兒者亦任自隨又緣頃年以來所有配隸或非重辟便至遠遷有司上陳又煩年限向後如有輕犯更不得配流五城

貶路恕田景度等詔

光祿大夫行太子詹事路恕正議大夫泗州刺史田景度  
僥求非類意望賄成迹既涉於邪佞罪難逃於憲典恕可  
吉州刺史景度可虔州刺史右武衛將軍薛昌期惑於誑  
誘通是貨財可丹王府長史右衛將軍趙良金莫能修簡  
妄有交通可撫州刺史

授李渤祕書省著作郎詔

前左拾遺內供奉李渤隱居求志殫見洽聞嘗致弓旌之  
招尚懷林壑之戀如聞肄其素業成此新書詞章典雅謀

議深遠獻於闕下良所嘉焉故洽今恩用清舊議可授祕書省著作郎

貶李位建州司馬詔

信州刺史李位心希祕術跡狎匪人謂捕景之可求乃先風之是黜名教之內本無異端典刑之中豈容僻好可守建州司馬

命渾瑊配享德宗廟庭詔

旌勸是先允協念功之義薦修爰舉聿追配享之儀贈太師瑊鍾秀誕靈逢時翼聖銘鏤金石帶礪山河績旣著於

先朝業宜光於後裔俾之陪祀用光遺勲宜配享德宗廟  
室

復置宥州詔

天寶中宥州寄理於經略軍寶應已來因循遂廢由是昆  
夷屢擾党項靡依蕃部之人撫懷莫及朕方宏遠略思復  
舊規宜於經略軍置宥州仍爲上州於郭下置延恩縣爲  
上縣屬夏綏銀觀察使

錄李洧等子孫詔

建中以來州軍及軍國歸人李洧李再春田昂李士真康

日知李澄揚政義符璘李惠登薛翼蘇清沔等王者報功  
義惟過厚存則加其殊秩歿則恤其遺孤然後忠不徒施  
人知所勸故徐州觀察使李洧等頃逢艱阻各著款誠或  
以地來歸或率徒效順名迹昭顯史冊具存先朝念功皆  
極封賞歲月稍久湮沒日多再有甄明用申激勸宜委中  
書門下即訪其子孫量材敘用

授康志寧等官詔

君臣運合故徇國以毀家勸賞義明故褒功而顯節存則  
酬其爵祿歿則錄其子孫然後忠義不遺典章斯在故慈



晉隰等州觀察使檢校兵部尚書康日知故徐州刺史兼御史大夫李洧等一十家皆有茂功藏於盟府故命搜訪后嗣光賁前人今志寧等或服戎著績或從官有成或投迹軍府之中或滯才州縣之職咸加甄錄各茂官榮庶乎受祿者無忘於聿修懷忠者使知其必報勉膺寵渥無替前勞

禁捕狐兔詔

如聞比來京兆府每及臘日府縣捕養狐兔以充進獻乖道理既違天性又勞人力自今已後宜並停

令御史臺勘覆諸司食料錢詔

諸司食料錢緣初令戶部出放已久散失頗多須有變通使其均濟其中書門下兩省及尚書省御史臺或務總樞機或職司彈糾而倍稱息利於體尤乖宜以戶部除陌錢每貫先收二十文數外更加五文委戶部別收貯計其所費逐處支給其本利錢先出放者宜各委本司勘會聞奏其合徵收者便充當司公廨什物添修等用其諸司食利亦準此勘會其合徵錢便充飯錢若數少不充以其前件除陌五文錢量所欠添本出放其所收五文錢每歲不闕

添本之外合有所餘諸司廨宇破壞者便充修補緣諸司人吏轉遷不常新舊之閒因緣乾沒諸稱走失職此之繇向後須令本判官勾當勒令一一交割者遞相公付仍委御史臺一人專知勘覆仍先具條流聞奏

貶潘高陽均王府長史詔

河南少尹潘高陽頃以母老兄患懇求寧觀覽其章奏用遂私情而乃自求宴安致茲淹緩理裝踰月即路涉旬旣乖人情頗致物議憲司舉劾宜有薄懲可均王府長史

捕殺武元衡盜詔

朕以不德君臨萬邦不敢自逸每懷兢惕而凶狡竊發殲我股肱是用當宁廢朝通宵忘寐永懷良輔何痛如之宜極搜擒以攄憤毒天下之惡天下共誅念茲臣庶固同憤嘆宜令京城及諸道所在同捕逐有能獲賊者賜錢一萬貫仍與五品官有官超授如本雖同謀或曾停止但能糾告當舍其罪仍同此科敢有藏匿全家誅戮布告遠近使明知之

禁捕盜煩擾僧人詔

近緣東都盜賊事連僧徒因此所繇遂有覺察今既各有

名籍不得恐動其已出城者所在安存其外國僧亦任隨便屠止

嚴犯贓罪詔

凡在職司必當廉慎苟懷貪汙實紊政經爲理之先固在懲誠其犯贓官本據律文刑名甚重頃者多從寬宥不足懲奸切在申明使其知懼自今以後如錢穀稍多及情狀難恕者宜杖決配流餘並比類節級科處如有此色所在長吏及觀察使不能糾察事發之後並據所犯輕重加責罰庶警貪吏以惠疲人

諭鎮州官吏將士詔

門下天地以大德煦物而高秋勵肅殺之威帝王以至道  
育人而前王設誅討之典於是乎有阪泉之役有丹浦之  
師情豈佳兵義存禁暴朕嗣膺寶厯於茲五年以惕厲居  
於人上以仁恕撫於天下恭惟文祖之訓敢以武功爲先  
昨者吳蜀興妖師徒獻捷朕每念陳原野之衆行鈇鉞之  
刑雖舉彝章頗懷慚德蓋不獲已豈樂於斯王承宗頃在  
苦廬潛窺戎鎮而內外以事君之禮將而必誅分土之儀  
專則有辟朕念其先祖常有茂勲貸以私恩抑於公議使

臣旁午以告諭孽童俯伏以陳誠願獻兩州期無二事朕亦欲收其後効用以曲全授節制於舊疆齒勲賢於列位況德棣本非成德所管昌朝又是承宗懿親俾撫近隣斯誠厚澤外雖兩鎮中實一家而承宗象恭懷奸宵貌稔禍欺裴武於得位之後縲昌朝於受命之中豺狼之心飽之而愈發梟獍之性養之而益生加以表䟽之間悖慢斯甚神祇所不捨天地所不容智士所以奮懷義夫所以興憤式遏亂略期於無刑冀行天誅示於有制其諸道諸軍進討兵馬已從別勅處分王承宗在身官爵並宜削奪其鎮

州管下將士官吏等久在戎行未知朝典或陷於邪說或迫以凶威雖有忠誠無由自達但能效順即是王人豈止惟新當加寵渥其有能回戈殄寇因事立功特有褒崇不拘資次貴爵厚祿設之而高懸實封名藩待之以懋賞其以一州歸順者便與當州刺史仍賜實封二百戶如先是刺史以州歸順者超三資與官仍賜實封三百戶如以一縣歸順者超兩資與官賜實封一百戶其長行官健歸順者當與優厚褒賞如將校內有翻然改圖梟斬元惡者授以不次之位寵以殊常之封王承宗如能革心悔過束身



歸朝待之如初一切不問仍舊賜官爵別加寵授於戲王者之師蓋除於暴亂止戈之武豈願於傷殘而承宗不能負荷舊勲祇承新命自貽其咎寧怨於天亟此興戎至於用鉞固非素意用歎於懷百辟萬方宜諒朕意宣示中外咸使聞知

令楊元卿優恤淮蔡歸順百姓詔

淮蔡近郊久隔皇化本殲凶虐在拯生靈況今賊黨攜離相繼效順思俾阡危之俗盡霑養牧之恩勞徠招綏今之所切其新除蔡州刺史楊元卿宜令與李愬商量計會且

於唐州東界選擇要便權置行蔡州如百姓官健有歸順者便準勅優卹存撫令知國恩必使全活

令刺史言事詔

列位選能切於守土分憂求瘼諒在親人言念疲黎載深注意自今已後刺史如有利病可言者不限時節申報節度觀察使

封吳秀琳濮陽郡王詔

刑賞大信國令必行義勇深誠旌答斯在西文城柵歸降都將吳秀琳堅拒逆之計結勤王之心翻然令圖竟效前

款高秩厚賜宜酬爾勞可試祕書監兼御史中丞封濮陽郡王賜實封二百戶賞錢萬貫仍令李愬署以重職以獎忠至

封鄧懷金新平郡王詔

見機效節誠固於危途秉義懷忠福生於死地挈其全邑誓彼萬心事且超於等倫賞豈限於班次郾城降將殿中監鄧懷金自王師壓境詔命先施識祝網之深恩感投身之有地縲俘以列介士無譁披於凶墟造我營部聆之者響振慕之者風趨銷遏亂源導迎善氣固可勒功王府播

美天衢拜爵當時傳封後裔可檢校太子賓客兼御史大夫封新平郡王并賜實封二百戶賞錢一萬貫

令定州入粟助邊詔

入粟助邊古今通制如聞定州側近秋稼多登屬以軍府虛貧未任收糴將設權宜之制以成儲蓄之資念切救人不同常例有人能於定州納粟五百石放同承優出身仍減三選聽集納粟一千石者使授解褐官有官者依資授官納粟二千石者超兩資授官如先有出身及官情願減選者每納三百石以減一選

却還處州刺史進助軍錢絹等詔

天下成賦固有常規刺史進錢實非舊典恐爲後例弊及  
疲民言念於茲義在惻隱其苗稷所進助軍錢絹共二萬  
六千匹端麻鞋一萬量宜却還本州苗稷將代貧下戶差  
稅箭一萬隻令付本道都團練使收管

誅吳元濟詔

吳元濟豺狼醜類敢悖天常不知覆露之恩輒肆猖狂之  
計拒捍成命焚劫鄰封誑誤我平人殘傷我赤子縣邑黎  
庶號呼屢聞朕爲人父母得不興愧亦嘗告諭曾靡悛心

稔慝挺災日滋月甚所以命貔貅之旅致原野之誅雷霆  
所當巢穴盡覆獲此凶豎正其刑書與衆棄之茲爲國典  
宜準法處斬其餘支黨並從別勅處分

赦王承宗詔

帝者承天子人下臨萬國觀乾坤覆載之施常務其曲全  
用德刑撫御之方每先有宏貸叛則必伐服而捨之倣於  
典謨亦尚斯道朕祗符前訓績嗣丕圖底寧方隅蕩滌氛  
祲上以攄祖宗之宿憤下以致黎庶之阜康思厚者生務  
去者殺至於包荒藏慝屈法伸恩苟衷誠之可矜則宥過

而無大王承宗頃居喪紀見賣於鄰封後領藩城受疑於  
朝野國恩雖厚時憲不容戚實自貽寵非我絕百辟卿士  
昌言在廷四方諸侯飛奏盈篋競請致討爭先出軍尚復  
廣示招懷務存容納至於動衆事豈願然開境愍罹其殺  
傷退舍爲休其士伍取陷救溺能無慘嗟以其先祖武俊  
有勞王室書於甲令銘在景鍾雖載駕王師再從人欲而  
十代之宥常切朕懷近以三朝稱慶八表流澤廣此鴻霈  
開其自新而承宗果能翻然改圖披露忠懇遠遣二子進  
陳表章緘圖印以上聞獻德棣之名部發困奉粟並竈貢

鹽地願帥於職方物請歸於司會且天子所臨莫非王土  
析茲舊服將表爾誠諒申效順之心悉見納忠之志抑而  
不撫何以示懷朕念此方亦猶赤子一物失所寢興靡寧  
忍驅樂土之人竟就陳原之戮既克翦暴常思止戈予之  
此心天地臨鑒況常山師旅舊有功勞將改往以修來誓  
酬恩而遷善鑒精誠之俱切俾渙汗而再敷曠滌乃愆斷  
於朕志復此殊渥常懷永圖其承宗所有瑕釁特宜洗雪  
可依前守銀青光祿大夫檢校吏部尚書鎮州大都督府  
長史御史大夫上柱國充成德軍管內支度管田鎮冀深



趙等州觀察處置等使應成德軍將士官爵實封等一切仍舊待之如初其管內四州百姓委承宗厚加安慰令守生業官吏以下各守職分於戲禍福無門善敗由己所鑒旣因於克念易輟因獲其就安行之維艱守在勿失凡百庶士宜知朕懷

罷諸道節度使兼支度營田使詔

事關軍旅並屬節制務係州縣悉歸廉察二使所領實曰管轄諸道支度營田承前各置使自艱虞以後名制因循方鎮除授之時或有兼帶此職遂令綱目所在各殊今日

金史卷之二十一  
一  
務修舊章思一法度去煩就理衆心爲宜唯別勅置營田  
處置使且令仍舊其忠武鳳翔武寧魏博山南東道橫海  
邠寧義成河陽等道支度營田使及淮南度支近已停省  
其餘諸道並準此處分

欽定全唐文卷六十一目錄

新文藝出版社藏書

憲宗 六

討李師道詔

追贈高沐吏部尚書詔

免李宗奭妻子緣坐詔

遺詔

輟朝侍膳勅

條貫江淮銅鉛勅

誅李錡并男師回勅

嚴定應試人事例勅

訪察薦舉勅

停實估勅

討王承宗招諭勅

定斷獄期限勅

梁悅復讎減死勅

優賜黔府將士勅

罰盧坦元義方立戟違式俸料勅

以戶部錢充州縣官課料勅

柳公綽崔芄罰俸勅

免徵李少和贓錢勅

貶吳憑等勅

追恤張茂昭勅

罰河南尹等俸料勅

貶李竹海康縣尉勅

處分諸司食利錢勅

誅殺武元衡賊張晏等勅

絕王承宗朝貢勅

停任廸簡等俸料勅

停來年正月朝賀勅

曲宥王遂勅

皇太后寢疾權不聽政勅

莊憲太后山陵修奉事勅

內外支錢抽貫備軍需勅

停賀冬賀正進奉勅

安置淮西歸順百姓勅

罰趙宗儒等俸料勅

欽定全唐文卷六十一

憲宗 六

討李師道詔

天覆至宏爲惡者每聞於自絕國章具舉千紀者難追其  
常刑元言致戒於佳兵丹浦本非其樂戰朕纘承鴻業祇  
奉睿圖居軫納隍動思濟物仗以大信御茲萬邦省躬靡  
忘於憂勤宏道必先於撫諭猶以庶政多缺至誠未孚兢  
兢之心豈自暇逸近者淮右致討宿兵累年宗社降靈妖  
氛克殄方櫜弓而匣刃期阜俗以息人旋議徂征諒非獲

已李師道代荷寵榮謬居垣翰功不列於勲籍過難追於  
簡書尚復潛包禍心果是僞布誠懇屬問罪蔡土徵師合  
圍助彼寇仇敢爲影援陰通信使密致帛書累抗表章請  
捨元惡所圖不軌事匪一端遂至伏聚奸兇震驚洛邑焚  
劫內庫擾動河陰皆欲撓軍旅之深機阻邦國之大計加  
以擅興兵甲侵軼徐方驅逼戎行凌脅中使惡逾滋蔓志  
益猖狂乃者盜發京師實啟端本又常賦不入自致愆違  
凡此罪名皆在不赦朕以新除淮寇務息征師素爲含容  
豈令獻效而乃懷其積惡懼彼羣言將佐交馳頻疏疊至



關心首罪請命求哀特降使臣往加宣諭而師道請令長子入侍闕庭願獻三州上歸圖印指期而發飛奏以聞詐爲納地之謀翻稔滔天之逆凡所陳列無非怨妄露其悖慢之詞備在封章之內明示百辟衆怒一心咸請致誅以懲無上猶爲伏念至於旬時又聞遽越封疆寇掠德棣焚蕪村落縱暴挺災大肆鴟張曾無畏忌斯則人神之所共棄天地之所不容罪惡貫盈理當撲滅宜令宣武魏博義成武寧橫海等軍節度兵馬分路並進同力攻討相爲犄角其李師道在身所有官爵並宜削奪其淄青將士如能

梟斬凶渠者先是六品已下官授三品正員官其先是五品已上官者節級超獎仍與實封五百戶莊宅各一區錢二萬貫於戲動衆興師誠有乖於至理養災蓄患懼流毒於生人數信未化於窮兇格物深慙於菲德甫平寇難遄務討除宵旰在懷良深愧歎庶將去暴永用止戈宣示中外咸令知悉

追贈高沐吏部尚書詔

圖難忘死爲臣之峻節顯忠旌善有國之令猷日者妖豎反覆侮我朝章而濮州刺史高沐劫在兇威潛輸忠款諷

其不庭之咎將冀革心數其煮海之饒聿求利國伏奏必陳其逆節漏師常破其陰謀竟以盜憎遂死王事歿而不朽風聲凜然式表漏泉之澤且彰勁草之節可贈吏部尚書仍委馬總訪其遺骸以禮收葬優恤其家若有子孫具名聞奏

免李宗奭妻子緣坐詔

李宗奭本以凶狠自抵誅夷用戒猖狂合從孥戮顧其微細已正刑章特示含宏載寬緣坐其妻韋氏及男女等先收在掖庭並宜放出

遺詔

朕以薄德嗣膺寶祚執圭璧以奉九廟垂衣裳以臨萬邦  
十有六年於茲矣賴天地敷祐宗社降靈內有百辟卿士  
外有州牧方伯文武並用忠賢叶心以弼予一人以康彼  
兆庶戡翦羣慝廓清九圍方保和平共登仁壽而萬務所  
逼六氣或侵遘疾有加至于大漸用申顧命式合典謨皇  
太子恒天縱睿哲日躋誠敬惟孝惟友克寬克仁必能承  
祖宗之丕訓守邦家之鴻業宜令所司具禮於柩前即皇  
帝位仍以司徒兼中書令宏攝冢宰應諸道節度觀察防

禦等使及諸州刺史寄任尤切並不須赴哀皇帝易月之制皆依舊典文武官等朝晡哭臨十五舉音其喪儀及山陵制度務從儉約嗚呼始終常禮奚可甚哀漢文至言朕所遵慕咨爾將相洎中外腹心爪牙之臣其敬保元子惟懷永圖以續我高祖太宗之耿光無廢朕命

輟朝侍膳勅

勅朕聞爲子之道莫大於寧親順色之方必先於養志此文王之孝曾氏之心每聆遺風常所景行伏以太上皇帝怡神閒館追想大庭將保靜延休滌慮寧體初陽變候舊

金史卷之五  
一  
恙愆和寢食之間有不安節夙夜憂灼豈遑寧居而內奉  
庭闈冀承安否嘗藥視膳且不暇於衣冠一日萬幾固有  
虧於聽覽庶政關決遂闕躬親恐中外具寮未悉予志起  
今月十六日以後權不聽政故茲宣示當體朕懷

條貫江淮銅鉛勅

錢貴物賤傷農害工權其輕重須有通變比者銅鉛無禁  
鼓鑄有妨其江淮諸州府收市銅鉛等先已令諸道知院  
官勾當緣令初下未盡頒行宜委諸道觀察等使與知院  
官切共勾當事畢日仍委鹽鐵使據所得數勘會聞奏

誅李琦并男師回勅

李琦幸因宗屬早列方隅德宗藉有土之權委之以泉貨  
順宗重維城之寄授之以旌旄恩深兩朝榮溢當代朕恭  
承寶祚首命端僚君臣之分益親天地之恩無盡偽詞三  
上懇請入朝推以至誠許其重任曾不知居不疑之地懷  
不測之端有梟獍噬食之心恃牛羊項領之力久蓄亡命  
敢有亂常謂干戈可得而興江山可得而恃悖言肆口逆  
狀滔天滅身之事擢髮難數國有大典與衆棄之爲人除  
害非朕敢捨致茲用辟終所愧懷李琦并男師回準法處

新其餘支黨已從別勅處分

嚴定應試人事例勅

自今已後州府所送進士如迹涉踈狂兼虧禮教或曾爲官司科罰或曾任州府小吏有一事不合入清流者雖薄有詞藝并不得申送入如舉送以後事發長吏奏停見任如已停替者殿二年本試官及司功官見任及已停替並量事輕重貶降仍委御史臺常加察訪

訪察薦舉勅

處分委御史臺諸道觀察使嚴加察訪不得容貸其諸司



所奏官屬及有狀論薦人如有贓犯過惡亦請具名聞奏  
量加殿罰所冀人知所懼舉不妄行爲官擇人得賢報國  
停實估勅

勅所納區段並依中估明知加價納物務在利及疲人若  
更徵剝實錢即是重傷百姓自今已後送省及留使區段  
不得剝徵折估錢但委刺史縣令分明告諭令加意織造  
不得濫惡故違節級科貶其供軍醬菜等價直合以留州  
使錢充者亦令見錢區段場納仍具每州每使合納見錢  
數及州縣官俸料納一半見錢數同分析聞奏仍便納入

金史卷之二十一  
今年旨條以爲常制餘依

討王承宗招諭勅

自古哲王之有天下者懲其暴亂則法所宜加察其情狀則罪有不及況故太尉兼中書令武俊忠扶邦國節著艱難覽視冊書想見風概而承宗毀棄門戶違悖君親遽肆姦凶自貽討伐藥盈千紀寧忘武子之勲蕭延紹封無廢鄼侯之嗣矧忠而見節禮以議賢宜降深恩庶行中典載明樵採之禁兼茂歸降之制好生之德俾洽人心止殺之源用孚朕志其王士平士則並宜各守舊官其武俊實封

仍特賜士則承襲鎮州大將昔著茂勲言念其勞每用增  
歎其有食實封者並宜依舊不須停給如領兵軍將以所  
領歸降者超二資與官賜實封二百戶仍賞錢一萬貫文  
其武俊士真松楸墳墓行營諸軍並不得輒有毀伐除暴  
勝殘事非獲已布德施惠仁豈遠乎用彰弔伐之師式示  
皇王之道宣布內外宜悉衷懷

定斷獄期限勅

刑部大理決斷罪囚過爲淹遲是長姦倖自今已後大理  
寺檢斷不得過二十日刑部覆下不得過十日如刑部覆

有異同寺司重加不得過十五日省司量覆不得過七日如有牒外州府節目及於京城內勘本推即日以報牒到後計日數被勘司卻報不得過五日仍令刑部具遺牒及報牒月日牒報都省及分察使各準勅文勾舉糾訪如有違越奏聽進止其有獄情可疑須再三詳審非限內可畢者即別狀分析并寺司每月已斷未斷囚姓名事由並申報中書門下

梁悅復讎減死勅

復讎殺人固有彝典以其申冤請罪視死如歸自詣公門

發於天性志在徇節本無求生之心寧失不經特從減死之法宜決一百配流循州

優賜黔府將士勅

黔中水災之後又辰潯初安如聞軍府之閒每事罄竭俾其存濟須有優矜其涪州緣屬荆南有供荆南節度錢二千四百貫令隨本州割還黔府兼於涪州送省錢三千八萬貫文內更取一千五百貫添賜黔府見在將士軍資

罰盧坦元義方立戟違式俸料勅

立戟官中大夫守京兆尹上柱國臨淄縣開國男賜紫金

魚袋元義方朝議大夫守尚書戶部侍郎判度支護軍賜紫金魚袋盧坦立戟雖令式所著似有關文而臺閣相承久爲定制盧坦元義方如有所見即合上聞造次而行殊乖審慎宜各罰一月俸料其戟仍令所司收納左司郎中陸則勾簡之任發付不精禮部員外郎崔備工部員外郎元禮等或以禮許人或守官假器此於申請其過尤深各罰一季俸料緣兵興以來勲賞超越其所立戟須有明文宜令所司準舊制待官階勲至三品然後申請仍編於格令永爲常式

以戶部錢充州縣官課料勅

河東河中鳳翔易定四道州縣久破俸給至微吏曹注官將同北遠在於理體切要均融宜以戶部錢五萬五千貫文充加四道州縣官課料

柳公綽崔玘罰俸勅

公綽崔玘所進絹等所司奏聞各有欠少事緣進獻皆合精詳致使闕遺固非審慎柳公綽宜罰兩季俸料崔玘罰一季俸料

免徵李少和贓錢勅

李少和職奉察廉迹乖周慎除替已後猶取公錢或交換未填或轉移私費今除已填納贓數外尚欠三千七百餘貫身已淪沒不可徵收宜放免

貶吳憑等勅

吳憑曾佐史府忝履宦途自宜畏法慎身豈得爲人掌貨事關非道理合懲愆宜配流韶州其付杜載錢物宰輔之任寵寄實深致茲貨財不能拒絕已令勘問悉合徵收貴全終始之恩俾宏寬大之典其所用錢物特宜矜免杜載等並釋放僧鑒虛付京兆府決重杖一頓處死其財產奴



婢官收

追卹張茂昭勅

張茂昭立功河朔舉族歸朝義烈之風史冊攸載如聞身歿之後家無餘財追懷舊勲特越常典宜歲賜絹二千匹春秋二時支給

罰河南尹等俸料勅

河南尹職在摘發奸盜隱伏無遺今河南府劫殺崔應家賊彰暴若斯收擒不獲致使漏網得非慢官其河南尹及本縣令捕賊官宜各罰一月俸料其捕賊官至較考日仍

書下考其留守下本巡所縣宜委權德輿節級科罰

貶李佇海康縣尉勅

佇虐下以慘訊罪違律至使饋餉皆絕瘐死非辜因其壅隔更令殘毀戕人及此良用憮然俾投禦魃之鄉以戒宇氓之長可守雷州海康縣尉

處分諸司食利錢勅

比緣諸司食利錢出舉歲深爲弊頗甚已有釐革別給滄錢其御史臺奏所勘責祕書省等三十二司食利本錢數內有重攤轉保稱甚困窮者據所欠本利並放其本戶中

納利如有十倍以上者旣緣輸利歲久理亦可矜量準前  
本利並放其納經五倍以上從今年十二月以前應有欠  
利並放起元和十年正月以後準前計利徵收其餘人戶  
等計其倍數納利非多不可一例矜放宜並委本司準前  
徵納其諸司所徵到錢自今已後仍於五分之一中常抽一  
分留添官本各勒本司以後相承收管其諸司應見徵納  
及續舉放所收利錢並準今年八月十五日勅充添修當  
司廨宇什物及令史驅使官廚料等用仍委御史臺勾當  
每常至年終勘會處分其諸司除䟽理外見在本錢據額

更不得破用如有欠失即便勒主掌官典所繇等據數填  
備其中書門下兩省及尚書省御史臺應有食利錢外亦  
便令準此條流處分其諸司除此食利錢更別有諸色本  
錢不得妄援此例

誅殺武元衡賊張晏等勅

勅張晏李惠嵩李寓嚴清受命孽臣害我良弼山虐之甚  
古今所無雖奸源不窮而天網難漏擒捕斯獲兵刃具存  
自相證明遂得情實宜從極法以快衆心并康少賁造端  
合謀不可異等宜處斬張公佐李少寧徐良季胡弟奴高

志巡田再興楊日暉華季進胡抱直劉憲生

闕

奉詮及李

惠嵩妻阿馬等並合從坐況乃同情宜付京兆府決痛杖

一頓處死蘇表藏蓄兵器銜耀軍謀朋遊悉無賴之徒取

受多不軌之物屬當

闕

索爰得其人京輦之下豈容此輩

宜決杖八十配流費州其妻阿康奴綠耳等不識陰情難

書罪罰趙環等妻阿樊阿唐張晏女二初則不知終然同

惡悉付京兆府各決二十放其鎮州進奏趙環并官健及

王承宗行官家人魏昇朝等一十八人並赴京兆府收管

待後䟽理處分侯倫李英雖言已歸本道欲於何處逃刑

待投獲日準例處分張晏趙環等七人如更有親族並合  
搜檢準今年八月勅處分其刀劍器械等並付所由準法  
處分

絕王承宗朝貢勅

勅天地至廣有自絕者不得容皇王至仁有當誅者不敢  
赦朕纘承丕業虔奉睿圖樂戰佳兵每思聖祖之誠納污  
藏垢嘗佩先哲之言罪有難原事非獲已成德軍節度管  
內支度營田恒冀深趙德棣等州觀察處置等使銀青光  
祿大夫檢校吏部尚書兼恒州大都督府長史御史大夫

上柱國王承宗自滌疵瑕累加獎拔列在維藩之重待以忠正之途謂懷君父之恩克勵人臣之節而動思棄命恣逞非心傲很反常橫厲無畏以其先祖常立忠勲每爲含容庶聞悛革曾不知陰謀逆狀久則逾彰凶德禍機盈而自覆乃敢輕肆指斥妄陳表章潛遣奸人竊懷兵刃賊殺元輔毒傷憲臣縱其凶殘無所顧忌推窮事跡罪狀彰明周覽讞詞良用驚嘆今罪人咸伏首惡有歸雖當去害之誅猶軫錄功之念宜令絕其朝貢使自懲省冀其翻然改過束身歸朝攻討之宜更俟後命儻或不能遷善即當續

有處分所爲指使蓋自承宗其事不在於三軍其事

闕延

於百姓所以但絕朝貢未加討除如不自新止於有罪咨  
爾成德之衆勉於忠順之機博野樂壽之郊本范陽管界  
劉總自授朝寄常罄公忠既有繼於能勞則宜仍於舊服  
其博野樂壽兩縣並卻賜劉總收管大中大夫檢校左散  
騎常侍兼少府少監駙馬都尉賜紫金魚袋王承系亦由  
勲伐之後錫以姻戚之榮莫顧寵私用包淫慝交通謀慮  
叶比奸凶撫茲情狀合正刑典俾居遐遠猶示寬宏宜於  
黔府安置朝請郎守太子左贊善大夫賜紫金魚袋王承



迪朝請郎守丹王府司馬上柱國賜紫金魚袋王承榮國  
有彝章亦宜從坐承迪宜於歸州安置承榮宜於通州安  
置仍並馳驛發遣各委本道具到州府月日奏聞雲麾將  
軍上護軍王士平忠武將軍守左神武將軍事兼御史大  
夫賜紫金魚袋王士則並志秉恭德家承茂勲旣申闕惡  
之議亦以全功臣紹續之慶示朝典旌別之宜委中書門  
下即加獎授嗚呼朕方以五常之道刑於萬國之風猶有  
棄德而崇奸興穢以自臭惟訓導之不至顧菲薄而增慙  
尚欲依違務宏天網而公卿庶尹多士具僚繼有陳論咸

請誅討沈吟軫慮未忍加兵屈法申恩廼茲懲絕迫於公議難徇衷懷宣示中外咸令知悉

停任迪簡等俸料勅

新授右散騎常侍任迪簡祕書少監獨孤郁等如聞疾患日久未在視事其俸料等宜令所司住給

停來年正月朝賀勅

勅淮蔡未賓師人暴露而三朝元會萬國來庭舉樂稱慶有懷愧惕其來年正月朝賀宜權停止諸軍優賜並準例處分

曲宥王遂勅

王遂令私屬吏人請兩池課料有乖慎守合示薄懲但緣  
頃年出軍南北置使頗聞約身奉國省費相懸每念前勞  
特寬常憲已從別勅處分其章從素柳季常各宜決四十  
其所請錢物委度支使準法據數徵納

皇太后寢疾權不聽政勅

朕聞事親之禮問安雖限於晨昏爲子之心就養在勤於  
左右斯實虞帝明訓周王遺風朕率而行之不敢有墜伏  
以皇太后母臨萬國子惠兆人存神保和養素全道屬詔

陽改候濡露感恩舊恙有加常膳頓減夙夜惶惕不知所  
寧今當專奉庭闈躬嘗藥餌脫冠解帶且無暇於寢興負  
扈臨軒安能親於聽斷起今日三日以後權不聽政故茲  
宣示宜體朕懷

莊憲太后山陵修奉事勅

蓋聞天地之德常存煦育之仁皇王之孝克念述遵之義  
朕纂承丕訓每務躬行而釁禍相延再罹熒疚大行太后  
慈顏永遠仙馭莫追遺旨丁寧俾親庶政祇奉號咽不知  
所措緬懷風樹之感俯追龜筮之期以復土方興役車未

已慮失農桑之候或貽凍餒之憂惻然憫傷思獲均濟緣上陵所要車牛夫役等除官中自有外並須和雇仍先折本戶夏稅錢訖度支以不折估匹段充填如本戶所折稅錢已盡即所司給付無令損折仍委山陵使與所司切加勾當不得輒令侵欺

內外支錢抽貫備軍需勅

寇賊未平國用茲廣若加賦歛重困黎元行權取濟自今已後應內外支用錢宜每貫除墊陌外量抽五十文仍於本道本使據數逐季收計其諸道錢便差綱部送副度支

收管隨貯納以備軍需賊平後則依常例

停賀冬賀正進奉勅

兩路兵戈尚未寧息眷言供億每慮勞煩將贍軍需必資  
省用其今年賀冬來年賀正進奉宜並停

安置淮西歸順百姓勅

勅淮西賊中百姓窮困相率歸順其數甚多言念生人載  
懷哀憫必資綏撫始獲安存於許汝行營側近置行鄆城  
委韓宏計議揀穩便處置又於唐州側近置行吳房縣仍  
令本界節度觀察使擇幹了官知縣事兼量置兵馬防護

使免憂危

罰趙宗儒等俸料勅

河中觀察使趙宗儒所收管內諸州錢物等既有勅文所  
宜遵守縱緣軍用亦合奏陳宜罰一月俸料崔鄩所令勘  
覆頗未詳盡以茲奉職可謂慢官宜罰一季俸料